



Na osnovu člana 61. stav 2. Zakona o upravi („Službeni glasnik BiH“, br. 32/02 i 102/09), člana 50. Zakona o policijskim službenicima Bosne i Hercegovine („Službeni glasnik BiH“, br. 27/04, 63/04, 506, 33/06, 58/06, 15/08, 63/08, 35/09 i 7/12), člana 8. stav (2) Zakona o Direkciji za koordinaciju policijskih tijela i o agencijama za podršku policijskoj strukturi Bosne i Hercegovine („Službeni glasnik BiH“, broj 36/08) i člana 5. Odluke o načinu i programu testiranja kandidata u procesu odabira policijskih službenika broj 01-02-715/04 od 08.12.2004. godine i 01-02-329/06 od 17.08.2006. godine, direktor Direkcije za koordinaciju policijskih tijela Bosne i Hercegovine, d o n o s i

ODLUKU

o metodu, načinu i sistemu bodovanja testiranja kandidata za polaznike osnovne policijske obuke prvog i drugog nivoa u Direkciji za koordinaciju policijskih tijela Bosne i Hercegovine

I

Ovom Odlukom utvrđuje se metod, način i sistem bodovanja testiranja kandidata za polaznike osnovne policijske obuke prvog i drugog nivoa u Direkciji za koordinaciju policijskih tijela Bosne i Hercegovine, odnosno sva bitna pitanja koja se odnose na postupak izbora i zapošljavanja kandidata.

II

Postupak selekcije kandidata sastoji se od:

- a) testa općeg znanja (posebni pisani test, interpretacija, esej i gramatika);
- b) testa fizičke sposobnosti;
- c) ljekarskog pregleda uključujući psiho test i intervju i
- d) intervju.

1. Test općeg znanja

Test općeg znanja obuhvaća četiri oblasti: posebni pisani test, esej, interpretacija i gramatika. Test općeg znanja biti će u skladu sa minimalnim stepenom obrazovanja potrebnim za nivo koji kandidat pristupa.

Test općeg znanja priprema komisija za izbor. Test općeg znanja se razlikuje za kandidate prvog i drugog nivoa osnovne policijske obuke.

Posebni pisani test ima 25 pitanja koja imaju više ponudjenih odgovora, a tačan je samo jedan.

Pisanjem eseja kandidat obrađuje zadatu temu, bilo iz života ili iz znanosti, na način koji uključuje razmišljanje i zaključivanje, ali također ima i sposobnost umjetničkog oblikovanja. U eseju do izražaja dolazi osobni stav, izbor problema o kojem piše i vlastiti način izlaganja i dosljednost u zaključivanju, i sklonost prema misaonoj razradi problematike.

Interpretaciju i poznavanje pravila gramatike komisija za izbor će cijeliti kroz esej.

Vrijeme rada testa je vremenski ograničeno i traje dva sata. Posebni pisani test traje 45 minuta. Pisanje eseja traje 45 minuta. Pauza između dva testa traje 30 minuta. Prilikom rješavanja testa kandidatu nije dozvoljeno korištenje bilo kakvih materijala. Za svaki tačan odgovor na posebnom pisanom testu kandidat dobiva po jedan bod, a za pisanje eseja kandidat može dobiti najviše 10 bodova. Ukoliko kandidat iz bilo kojeg od testova ne ostvari prolazni broj bodova eliminiše se iz dalje procedure. Ocjene posebnog pisanog testa i eseja se zbrajaju i najveći osvojeni broj bodova testa općeg znanja je 35.

2. Test fizičke sposobnosti

Provjera fizičkih sposobnosti sastoji se od utvrđivanja morfološkog statusa kandidata i provjere motoričke sposobnosti.

Morfološki status

Muškarci	
Tjelesna visina:	172 cm i više
Tjelesna težina:	+5 – 15 kg u odnosu na visinu - 100
Žene	
Tjelesna visina:	162 cm i više
Tjelesna težina:	+3 – 15 kg u odnosu na visinu -100

Kandidati koji ne ispunjavaju morfološki status u pogledu visine i težine ne ulaze u postupak provjere motoričkih sposobnosti.

Motorička sposobnost

Skok u dalj iz mjesta (centimetri)

Bodovi	0	2	3	4	5
	do	201	211		
Muškarci	200	210	225	226– 240	241
	do	151	161	171	
Žene	150	160	170	180	181

Sklek (10 sekundi)

Bodovi	0	2	3	4	5
	do 8	9 -10	11- 12	13 -14	15
Muškarci					
	do 4	5 – 6	7 - 8	9 -10	11
Žene					

Napomena: Žene izvode sklek sa osloncem na koljenima

Podizanje trupa (30 sekundi)

Bodovi	0	2	3	4	5
	do	18 -	21 -	24 -	
Muškarci	17	20	23	26	27
	do	15 -	18 -	21 -	
Žene	14	17	20	23	24

Okretnost sa palicom (sekundi)

Bodovi	0	2	3	4	5
	do	9,99-	8,68-	7,27-	
Muškarci	10,00	8,69	7,28	5,77	5,76
	do	11,99-	10,68-	9,27-	
Žene	12,00	10,69	9,28	7,77	7,76

Kolut naprijed, kolut nazad-trčanje (sekundi)

Bodovi	0	2	3	4	5
	do	6,99-	6,38-	5,67-	
Muškarci	7,00	6,39	5,68	4,87	4,86
	do	8,99-	8,38-	7,67-	
Žene	9,00	8,39	7,68	6,87	6,86

Taping rukom (20 sekundi)

Bodovi	0	2	3	4	5
	do	19-	24-	29-	
Muškarci	18	23	28	33	34
	do	16-	20-	25-	
Žene	15	19	24	29	30

Kuper test (trčanje 12 minuta) - metrima

Bodovi	0	2	3	4	5
	do	2201-	2401-	2601-	
Muškarci	2200	2400	2600	2800	2801
	do	1701-	1801-	1951-	
Žene	1700	1800	1950	2100	2101

Kod procjene normativa motoričkih sposobnosti boduje se sedam testova skalom od 0 do 5 bodova, pri čemu je moguće ostvariti maksimalnih 35 bodova.

Ukoliko je kandidat na dva i više testova ocijenjen sa 0 (nula) bodova ne zadovoljava nivo prolaznosti motoričkih sposobnosti. Test motoričkih sposobnosti je eliminatoran.

2.1. Opis testova za procjenu motoričkih sposobnosti

1) Skok u dalj iz mjesta

Instrumenti:

- tatami strunjače
- čelična traka za mjerenje

Zadatak:

Ispitanik se odrazi sunožno sa linije obilježene na parketu i doskoči na strunjaču što može dalje. Obavezan je sunožan doskok. Izvode se tri skoka, a nepravilno izvedeni skokovi se ponavljaju.

Ocjenjivanje:

- mjeri se dužina skoka normalno na odraznu liniju. Vrijedi najduži skok izmjeren u centimetrima.

Napomena: prije svakog skoka ispitanik namaže pete magnezijumom. Ispitanik skače bos, dupli odraz nije dozvoljen. Skok se izvodi iz sunožnog položaja stopala. Dozvoljeno je podizanje na prste prije skoka.

2) Broj sklekova za 10 sekundi

Vrijeme rada: 10 sekundi.

Instrumenti:

- strunjača,
- štoperica sa 1/10 sekundi.

Zadatak:

Ispitanik zauzme položaj upora na rukama tako da prstima nogu i dlanova dodiruje podlogu. Tijelo i ruke zauzimaju položaj pravog ugla. Iz te pozicije ispitanik se spušta naprežući mišiće sve dok grudima ne dodirne pod, a zatim se ponovo podigne u prvobitni položaj. Navedenu vježbu ispitanik radi najbrže što može.

Ocjenjivanje:

- ocjenjuje se broj korektno izvedenih i dovršenih sklekova u intervalu od 10 sekundi.

Napomena: ispitanik sve vrijeme drži ispruženo tijelo. Tijelo se ne smije njihati naprijed ili nazad pri spuštanju. Laktovi pri spuštanju i podizanju moraju prolaziti uz tijelo.

3) Broj podizanja trupa za 30 sekundi

Vrijeme rada: 30 sekundi.

Instrumenti:

- strunjača,
- štoperica sa 1/10 sekundi.

Zadatak:

Ispitanik leži na leđima, na tlu (strunjača), sa nogama zgrčenim pod uglom od 90 stepeni. Dlanovi su ukršteni na potiljku sa laktovima razmaknutim u stranu. Partner mu fiksira stopala. Ispitanik izvodi podizanje trupa sa zasukom, naizmjenično u lijevu i desnu stranu što brže može, u intervalu od 30 sekundi. Pri tom mora dotaći laktom suprotno koljeno.

Ocjenjivanje:

- ocjenjuje se broj korektno izvedenih i dovršenih dizanja u vremenu od 30 sekundi.

Napomena: Ispitanik pri povratku u početni položaj mora svaki put sa oba lakta dotaći strunjaču a da se pri tom ne pomaže odbijajući se od nje.

4) Okretnost sa palicom

Instrumenti:

- strunjače,
- palica dužine 1 m,
- štoperica sa 1/10 sekundi.

Zadatak:

Ispitanik stoji na sredini strunjače držeći palicu za krajeve iza leđa i izvodi zadatak po striktno utvrđenom redoslijedu radnji. Na znak ispitivača prelazi preko palice (prekorakom ili sunožnim odrazom po izboru) naprijed, predruči sa palicom, okrene se za 180 stepeni, sjedne, legne (ruke su ovom prilikom u predručenju koso na dolje) provuče palicu ispod koljena, digne se (palica mu je ostala iza leđa) pređe ili sunožno preskoči palicu i stane mirno sa palicom u predručenju. Test se izvodi tri puta.

Ocjenjivanje:

- mjeri se vrijeme od znaka „sad“ do stava mirno sa predručenjem u 1/10 sekunde. Upisuju se rezultati sva tri mjerenja, a računa se najbolje postignuto vrijeme.

Napomena: Za sve vrijeme izvođenja zadatka ispitanik mora da objema rukama drži palicu. Ukoliko je ispusti, zadatak nastavlja od dijela u kojem mu je ispala.

5) Kolut naprijed – kolut nazad – trčanje

Instrumenti:

- dvije strunjače,
- štoperica sa 1/10 sekundi.

Zadatak:

Ispitanik iz upora čučeca (sa početka strunjače) na znak mjериoca napravi kolut naprijed do čučnja, okreće se u čučnju za 180 stepeni i napravi kolut nazad tako da dođe do druge ivice strunjače. (Ukoliko se kolut završi ranije, proizvoljnim načinom se dolazi do kraja strunjače). Nakon toga, ispitanik trči do kraja sa kojeg je startovao, okreće se za 180 stepeni i trči nazad do suprotnog kraja strunjače nastojeći da ga što prije dodirne nogom.

Ocjenjivanje:

- ocjenjuje se vrijeme od znaka mjериoca do trenutka ispitanikovog dodira nogom ruba strunjače, a tačnost mjerenja se kreće na nivou 0,1 sekunde.

Napomena: Ispitanik pri izvođenju koluta napred i koluta nazad mora da drži oba dlana na strunjači.

6) Taping rukom za 20 sekundi

Vrijeme rada: 20 sekundi.

Instrumenti:

- sto na kom su učvršćene dvije okrugle ploče prečnika 20 cm, na međusobnoj udaljenosti od 60 cm,
- štoperica sa 1/10 sekundi.

Zadatak:

Ispitanik sjedi za stolom sa slabijom rukom postavljenom na sredinu (između ploča) a jačom ukršteno preko slabije na suprotnu ploču. Na znak mjериoca, jačom rukom brzo naizmjenično dodiruje čas jednu čas drugu ploču.

Ocjenjivanje:

- ocjenjuje se broj ispravno izvedenih ciklusa.

Napomena: Ostvareni rezultat se iskazuje u sirovim bodovima pri čemu jedan bod podrazumijeva dva dodira (jačom rukom dodirnuti jednu i drugu ploču) odnosno jedan ciklus. Nepotpun ciklus se ne boduje.

7) Kuperov test trčanja 12 minuta

Instrumenti:

- štoperica sa 1/10 sekundi
- staza od 400 metara
- pištaljka

Zadatak:

Ispitanici sa cilja, iz visokog starta kreću na znak pištaljke, sa ciljem da pretrče ili prehodaju što više metara za 12 minuta.

Ocjenjivanje:

- mjeri se pretrčana dužina u metrima

Napomena: Ispitanici ne smiju stati, sjesti ili leći za vrijeme trajanja testa.

3. Ljekarski i psihološki pregled

Testiranje psihičkih sposobnosti i ljekarski pregled kandidata provest će ovlaštena zdravstvena ustanova s kojom Direkcija ima zaključen ugovor. Rezultat ljekarskog i psihološkog pregleda je eliminatoran.

4. Intervju

Komisije za izbor kandidata obavlja razgovor sa svakim kandidatom pojedinačno u vremenskom trajanju od 5 do 10 minuta. Komisija radi po principu postavljanja pitanja, komentarisanja određenih pojava i događaja. Primjenjuje se nestandardizovani intervju pripremljen na osnovu podataka dobijenih iz prijave i rezultata prethodnih testiranja. Ocjena intervju obuhvata sljedeće parametre:

- 1) Fizički izgled i urednost
 - uredan/neuredan, skladan/nemaran, fizički nedostaci...
- 2) Stavovi, ambicije
 - dobra predstava (saznanja) o radu policije/loša (nikakva), želja za usavršavanjem i ličnim razvojem/bez želje, ambicioznost/nedostatak ambicije...
- 3) Interesovanja za različite oblasti
 - snažna interesovanja u raznim oblastima (muzika, sport, književnost, film,...)/bez interesovanja, otvorenost duha/zatvorenost...
- 4) Komunikacija
 - odgovornost/neodgovornost, kreativnost/nedostatak, sposoban da rješava probleme (razmišlja o njima)/nesposoban, donosi zaključke i brzo shvata/ne donosi i ne shvata, dobro jezičko izražavanje (verbalna fluentnost, komunikativnost, prikladno izražavanje)/loše (suprotno od prethodno navedenog kao i zamuckivanje, mucanje, tepanje i sl. što ometa rad i komunikaciju)...
- 5) Osnovna obilježja ličnosti;
 - stabilan i opušten/nestabilan, učtiv/drzak, prijatan (ponašanje, držanje, maniri)/neprijatan, siguran u sebe (dosledan)/nesiguran, ima samopouzdanje/nema, ima samokontrolu/nema...

Svaki član Komisije za izbor kandidata učestvuje u intervjuu i ocjenjuje kandidata ocjenom od 1 do 20, uz objašnjenje. Rezultat intervju će biti zbir bodova koji su dali svi članovi Komisije podjeljen sa brojem članova Komisije za izbor. Intervju je eliminatoran.

VREDNOVANJE POSTIGNUTIH REZULTATA U TOKU POSTUPKA SELEKCIJE

Vrednovanje postignutih rezultata u toku postupka selekcije vrši se nakon završenog postupka selekcije.

Maksimalan broj bodova koji kandidat može ostvariti u toku postupka selekcije u pojedinim fazama postupka je:

- test općeg znanja.....35 bodova
- test fizičke sposobnosti35 bodova
- intervju.....20 bodova

UKUPNO:.....90 bodova

Kandidat u postupku selekcije za zapošljavanje policajaca i mlađih inspektora u Direkciji može ostvariti maksimalan broj bodova 90.

III

Eliminacioni prag iz tačke II ove Odluke predstavlja onaj broj bodova koji je dovoljan za uspijeh kandidata na testu i određen je prema nivou pristupa, i to:

- a) za prvi nivo: čin policajca – eliminacioni prag iznosi 60% tačnih odgovora, odnosno pokazanog znanja na testu općeg znanja uključujući i testove fizičke sposobnosti, kao i ocjenu na intervjuu;
- b) za drugi nivo: čin mlađeg inspektora – eliminacioni prag iznosi 75% tačnih odgovora, odnosno pokazanog znanja na testu općeg znanja uključujući i testove fizičke sposobnosti, kao i ocjenu na intervjuu.

IV

Ocjenjivanje kandidata sprovodi Komisija za izbor na način kako je propisano Zakonom o policijskim službenicima Bosne i Hercegovine i podzakonskim aktima.

V

Ova Odluka stupa na snagu danom donošenja.

Broj: 20-02-02-2-390-1/13
08.05. 2013. godine,
Sarajevo

